

ԱՉԴԱՐԱՐ

ՏԵՂԵԿԱՏՈՒ ԱՌԱՋՆՈՐԴԱՐԱՆԻ ՀԱՅՈՑ ԲՈՒԷՅԹԻ ԵՒ ՇՐՋԱԿԱՅԻՑ ՀԱՅՈՑ ԹԵՄԻՆ

P.O.Box: 8157, Salmiyeh 22052- Kuwait. Tel: 965-25614392, Fax: 965-25638312, e-mail: prelacy@armenianprelacykw.org

ԼՈՐ ՇՐՋԱՆ, Ը. Տարի, Թիւ 348, Ուրբաթ, 26 ՕԳՈՍՏՈՍ, 2016

ՀԱՄԱՅՆՔԱՅԻՆ

ԱՅՑԵԼՈՒԹԻՒՆ ՀԱՅԱՍՏԱՆԻ ՀԱՆՐԱՊԵՏՈՒԹԵԱՆ ԴԵՍՊԱՆԱՏՈՒՆ



Քուէթի եւ Շրջակայից Հայոց Թեմի Առաջնորդ՝ Գերպ. Տէր Մասիս Ծ. Վրդ. Զուպույեան, ազգային մարմիններու ներկայացուցիչներու պատուիրակութեամբ, այցելեց Հ.Հ. Քուէթի դեսպանատունը, նորանշանակ արտակարգ եւ լիազօր դեսպան, Պրն. Մանուէլ Բաղէեանի ժամանման առիթով: Պատուիրակութեան կը մասնակցէին Սրբոց Վարդանանց եկեղեցոյ հովիւ՝ Արժ. Տէր Արտակ Քինյ. Քէհեաեան, Թեմիս Երեսփոխանական Ժողովի ատենապետ՝ Պրն. Յարութ Պետիրեան, Ազգային Վարչութեան ատենապետ՝ Պրն. Մունիր Դարբինեան, Եկեղեցոյ Հիմնախնդրի Լուծման Մարմնի ատենապետ՝ Իշխան Անուշաւան Նազարեան, ՀՅԴ պատասխանատու կազմի ներկայացուցիչ՝ Պրն. Յակոբ Պետիրեան եւ Հայ Դատի Յանձնախումբի ներկայացուցիչ՝ Պրն. Արմէն Արմուճեան: Պրն. Դեսպանը, իր ազնի տիկինն ու Հիւպատոս՝ Պրն. Լետն Պետրոսեանը դիմաւորեցին պատուիրակութիւնը եւ հիւրընկալեցին դեսպանատան դահլիճին մէջ:

Ծանօթացման արարողութենէն ետք խօսք առաւ Պրն. Դեսպանը եւ փոխանցեց իր տպաւորութիւնները, որ լսած ու նախորդ իր այցելութեան տեսած էր Քուէյթի մասին: Գերպ. Հայր Սուրբը՝ Քուէյթի եւ Շրջակայից Հայոց Թեմի անունով, բարի գալուստ մաղթեց Պրն. Դեսպանին եւ իր համեստափայլ տիկնոջ՝ Տիկ. Լիլիթին, ապա շեշտեց դեսպանատուն ու համայնք ձեռք-ձեռքի, միասնաբար աշխատելու անհրաժեշտութեան մասին, ի նպաստ հայ ժողովուրդի ու հայրենիքի հզօրացման: Պրն. Յարութ Պետիրեան, բարի գալուստի իր խօսքէն ետք, ամփոփ պատկերացումը կատարեց Քուէյթի ազգային մարմիններու կառոյցին ու գործելաձեւին:

Նոյնպէս պաշտօնական բարի գալուստի ու բարի միասնական ընթացքի խօսքեր արտասանեցին բոլոր ներկաները:

Պաշտօնական բաժնէն ետք, տեղի ունեցաւ մտերմիկ զրոյց, Քուէյթ-Հայաստան փոխ յարաբերութիւններուն եւ համայնքի ներկայ վիճակին ու կարիքներուն մասին, որու ընթացքին Պրն. Յակոբ Պետիրեան, մասնաւորեց Քուէյթ-Երեւան ուղղակի՝ առանց կանգ առի, օդանաւային գծի հաստատման կարելորութիւնը, որ ոչ միայն հայութեան, այլ քուէյթցի եւ օտար շրջիկներու եւ յատկապէս սնտեսական ներածութեան աշխուժացման նպաստող հեռանկար է:

Աւարտին պատուիրակութիւնը ունեցաւ յիշատակի նկար Պրն. Դեսպանին հետ:

ԽՈՐՀՐԴԱԿՑՈՒԹԻՒՆՆԵՐ ՄԻՍԻ ԿԱԹՈՂԻԿՈՍԱՐԱՆԻ ՎԵՐԱԴԱՐՁԻ ԴԱՏԻՆ ՇՈՒՐՋ

Անցնող օրերուն, Ն.Ս.Օ.Տ.Տ. Արամ Ա. Կաթողիկոս շարք մը խորհրդակցութիւններ ունեցաւ Միսի Կաթողիկոսարանի վերադարձի դատին շուրջ, Ժընեւի մէջ: Ինչպէս ծանօթ է, որ Մեծի Տանն Կիլիկիոյ Կաթողիկոսութիւնը 27 Ապրիլ 2015-ին Թուրքիոյ մէջ դատ բացած էր՝ պահանջելով Միսի Կաթողիկոսարանի պատմական կալուածը:

Խորհրդակցութիւններու ընթացքին քննարկուեցան Թուրքիայէն ներս կատարուած վերջին զարգացումները, ինչպէս նաեւ Եւրոպայի Մարդկային Իրաւունքներու Դատարանի եւ Թուրքիոյ յարաբերութիւններու միջեւ ստեղծուած նոր պայմանները ու անոնց հաւանական ազդեցութիւնը մեր դատին վրայ: Խորհրդակցութիւնները նաեւ ընդգրկեցին յառաջիկային առնուելիք քայլերուն կարելիութիւնները:



Բնականաբար այս դատին գծով առնուած որեւէ մէկ քայլի կամ արդիւնքի մասին միշտ տեղեակ պիտի պահենք մեր ժողովուրդը:

ՀԱՅԿԱԿԱՆ

Աբրահամեան. «Պայմանաւորուածութիւն Ձեռք Բերուած Է Հայ-Իրանական Սահմանին Վրայ Ազատ Տնտեսական Գօտի Հիմնելու Շուրջ»

Հայ-իրանական սահմանին վրայ ազատ տնտեսական գօտիի հիմնումը նոր կարելիութիւններ կը բանայ Հայաստանի տնտեսութեան զարգացման համար: «Բազէ-2016» համահայկական երիտասարդական հաւաքի մասնակիցներուն հետ հանդիպումին ընթացքին այս մասին ըսած է Հայաստանի վարչապետ Յովիկ Աբրահամեան:

«Սոչիի մէջ Եւրասիական տնտեսական միութեան անդամ երկիրներու վարչապետներու վերջին հանդիպումին ընթացքին մենք պայմանաւորուածութիւն ձեռք բերած ենք հայ-իրանական սահմանին՝ Մեղրիի շրջանին մէջ, ազատ տնտեսական գօտի հիմնելու մասին: Ասիկա շատ կարեւոր ծրագիր է, որ զարգացման նոր կարելիութիւն կը բանայ մեր տնտեսութեան համար», «Արմէնփրես»-ի հաղորդումով՝ նշած է վարչապետը:

«Այդ տնտեսական գօտին պիտի ըլլայ Մեղրիի շրջանին մէջ: Գիտեք, որ մեր առաջնահերթ խնդիրներէն է նաեւ շրջանային զարգացումը, եւ տնտեսական գօտիի հիմնումը էականօրէն կը նպաստէ Մեղրիի շրջանի զարգացմանը վրայ: Պիտի ստեղծուին նոր աշխատատեղեր, պիտի բացուին նոր կարելիութիւններ», ըսած է վարչապետը:

Ան նաեւ աւելցուցած է, որ ծրագիրը կարելիութիւն կու տայ Իրանին, Եւրասիական տնտեսական միութեան անդամ երկիրներուն հետ միասին ձեռնարկութիւններ հիմնելու ազատ տնտեսական գօտիին մէջ, արտադրութիւն կազմակերպելու եւ առանց մաքսատուրքերու արտահանելու դէպի Եւրասիական տնտեսական միութեան անդամ երկիրներ:

Կրթութեան Նախարարը Ընդունած Է Միացեալ Նահանգներու Միջազգային Զարգացման Գործակալութեան Նոր Նշանակուած Տնօրէնը

Հայաստանի կրթութեան եւ գիտութեան նախարար Լեւոն Սկրտչեան ընդունած է Միացեալ Նահանգներու Միջազգային զարգացման գործակալութեան (ԵՈՒ. Էս. Էյտ.) հայաստանեան առաքելութեան նոր նշանակուած տնօրէն Տեպորա Կրիսթըրը, Հայաստանի մէջ Միացեալ Նահանգներու փոխդեսպան Ռաֆիք Մանսուրը եւ Միջազգային զարգացման գործակալութեան աշխատակիցները:

Լեւոն Սկրտչեան բարձր գնահատած է Հայաստանի մէջ Միացեալ Նահանգներու Միջազգային զարգացման գործակալութեան ծաւալած գործունէութիւնը, մասնաւորաբար կրթութեան եւ գիտութեան նախարարութեան հետ համագործակցութեան մակարդակը: «Ամերիկեան քանի մը ծրագիրներ կան, որոնք ինծի համար կարեւոր են ինչպէս կրթութեան, այնպէս ալ քաղաքական առումով, խօսքը կը վերաբերի «Խաղաղութեան միաւորում»-ի հետ համագործակցութեան, որուն զաղափարախօսութեան մէջ ամփոփուած է ամերիկացի ժողովուրդին աւանդական հանդուրժողական եւ բազմաբեւեռ մտածողութիւնը: Վերջերս ծանօթացայ նաեւ «Դասաւանդէ՛ Հայաստան» կազմակերպութեան գործունէութեան, որուն զաղափարախօսութեան հիմքը եւս

ամերիկեան մտածողութիւնն է: Խորապէս համոզուած եմ, որ Հայաստանի մէջ առկայ է նախ եւ առաջ հասարակական մտածողութեան փոփոխութիւններու անհրաժեշտութիւնը, եւ վստահ եմ, որ այս ուղղութեամբ շատ ծրագիրներ միասին կեանքի կը կոչենք», նշած է Լեւոն Մկրտչեան:

Նախարարը ամերիկացի պաշտօնատարներուն ներկայացուցած է կրթութեան համակարգի կարելոր մարտահրաւերները՝ մասնաւորապէս առանձնացնելով հանրակրթութեան եւ բարձրագոյն ուսումնական հաստատութիւններու համակարգերու բարեփոխումները: Հանրակրթութեան համակարգին մէջ նախարարը շեշտը դրած է յատկապէս փոքր դպրոցներու պահպանման խնդիրին վրայ՝ կարելոր նկատելով փոքր դպրոցներու պահպանման հայեցակարգին մշակումը: Անդրադառնալով բարձրագոյն կրթութեան բարեփոխումներու անհրաժեշտութեան՝ նախարարը ընդգծած է այդ հոլովոյթին մէջ կրթութեան որակի ապահովման գործօնը: Ան շեշտը դրած է համալսարանական կրթութեան ինքնավարութեան բարձրացման հարցին վրայ՝ ընդգծելով կառավարման խիստ կեդրոնացեալ ըլլալու հանգամանքը: Նախարարը տեղեկացուցած է, որ Հայաստանի կրթութեան եւ գիտութեան նախարարութիւնը քայլերու կը ձեռնարկէ նաեւ փտածութեան դէմ պայքարի ռազմավարութեան պարունակին մէջ՝ փորձելով բեռնաթափել կառավարման կեդրոնացուածութիւնը:

Նախարարը պատուիրակութեան ղեկավարին ուշադրութեան յանձնած է այն հանգամանքը, որ Համաշխարհային դրամատան վարկային ծրագիրները կրթութեան կառուցուածքային խնդիրներու լուծման մեծապէս նպաստելէ ետք պէտք է ուղղուէին բովանդակային խնդիրներու լուծման: Խօսելով կրթութեան համակարգին մէջ ներկայիս Համաշխարհային դրամատան վարկային ծրագիրով իրականացուող հանրապետութեան կարգ մը դպրոցներու նորոգութեան աշխատանքներուն մասին՝ Լեւոն Մկրտչեան փափաք յայտնած է, որ դրամատան հետագայ վարկային միջոցները ուղղորդուին կրթութեան որակի բարձրացման ծրագիրներուն, որոնք պիտի նպաստեն բարձրագոյն կրթութեան եւ աւագ դպրոցի բովանդակութեան ու որակեալ կրթութեան ապահովման:

Ռաֆիք Մանսուր ընդգծած է, որ կրթութեան եւ գիտութեան նախարարութեան հետ ամուր գործընկերութիւնը հիմնուած է ընդհանուր արժէքներու վրայ, որոնցմէ մէկն ալ այն է, որ կրթութիւնը մարդու իրաւունք է, որ կենսական ու առանցքային դերակատարութիւն ունի անհատի եւ ընկերային-տնտեսական զարգացման առումով: Անոր համաձայն, Միացեալ Նահանգներուն համար երեխաներու իրաւունքներու պաշտպանութիւնը եւս կը շարունակէ մնալ գերակայ խնդիր, ինչ որ կը կիսեն հայաստանցի գործընկերներուն հետ՝ կրթութեան եւ գիտութեան նախարարութեան ու Հայաստանի կառավարութեան միւս օղակներուն մէջ: Փոխդեսպանը վստահեցուցած է, որ պատրաստ են շարունակելու գործընկերութիւնը այս եւ այլ կարելոր հարցերու շուրջ:

Լեւոնային Ղարաբաղի Մէջ Համաներում Կրնայ Յայտարարուիլ

Լեւոնային Ղարաբաղի Ազգային ժողովի նախագահ Աշոտ Ղուլեան 24 Օգոստոսին գլխաւորած է աշխատանքային խորհրդակցութիւն մը, որուն ընթացքին քննարկուած է Լեւոնային Ղարաբաղի Հանրապետութեան հռչակման 25-ամեակին առիթով համաներում յայտարարելու մասին նախագահ Բակօ Սահակեանի առաջարկը:

Լեռնային Ղարաբաղի Ազգային ժողովի մամլոյ ծառայութենէն յայտնած են, որ սահմանադրութեան եւ Ազգային ժողովի կանոնակարգին համաձայն, նշուած առաջարկը խորհրդարանին կը ներկայացուի Ազգային ժողովի համապատասխան որոշումի նախագիծի ձեւով, որ պէտք է համաձայնութեան արժանանայ Ազգային ժողովի լիազուար նիստին: Նախօրէին ներկայացուած որոշումի նախագիծը պատգամաւորները քննարկած են Ազգային ժողովի պետական-իրաւական հարցերու մնայուն յանձնախումբին մէջ եւ անհրաժեշտ պարզաբանումներ ստացած Լեռնային Ղարաբաղի Հանրապետութեան նախագահի ներկայացուցիչ Արա Լազարեանէն:

Ամփոփելով հանդիպման արդիւնքները՝ Աշոտ Ղուլեան յայտարարած է, որ 25 Օգոստոսին՝ ժամը 11:00-ին պիտի գումարուի Ազգային ժողովի արտակարգ նստաշրջան՝ Լեռնային Ղարաբաղի Հանրապետութեան նախագահին առաջարկած օրակարգով:

Հայաստանն Ու Սերպիան Պիտի Մասնակցին Միացեալ Նահանգներու Հովանաւորութեամբ Տեղի Ունենալիք Ռազմափորձին



Ռուսիոյ դաշնակիցներ Հայաստանը եւ Սերպիան պիտի մասնակցին Միացեալ Նահանգներու հովանիին տակ գործող ՕԹԱՆ-ի անդամ երկիրներուն հետ Գերմանիոյ մէջ տեղի ունենալիք ռազմափորձերուն: Այս մասին կը գրէ Հրաչ Մելքումեան:

Ռազմափորձերը տեղի պիտի ունենան 27 Օգոստոսէն մինչեւ 15 Սեպտեմբեր՝ Գերմանիոյ զինուորական խարիսխին մէջ: Կազմակերպիչը

Եւրոպայի մէջ տեղակայուած Միացեալ Նահանգներու զօրքերու հրամանատարութիւնն է: Ռազմափորձերուն մասնակցելու համար ճամբորդական, կեցութեան, սնունդի, զինավարժարաններէն օգտուելու ծախսերը կը հոգայ ամերիկեան կողմը:

Ամերիկեան զինուած ուժերու հաղորդագրութեան մէջ նշուած է, որ ռազմափորձերուն նպատակն է բազմազգ միջավայրի մէջ բարելաւել փոխադարձ գործակցութիւնը եւ փոխըմբռնումը գործընկերներուն հետ մարտավարական մակարդակով կայացող ցամաքային զօրքերու գործողութիւններուն մէջ: Նշուած է նաեւ, որ նման ռազմափորձեր կը կատարուին տարին երկու անգամ:

Ռազմափորձերուն պիտի մասնակցին 3 հազար 100 զինուորներ 20 երկիրներէ: Յետխորհրդային տարածքէն պիտի մասնակցին Հայաստանը, Ուքրանիան, Մոլտովան եւ Լիթվիան:

Նշենք, որ Հայաստան կը մասնակցի թե՛ Ռուսիոյ հետ, թե՛ Հաւաքական անվտանգութեան պայմանագիրի կազմակերպութեան շրջանակին մէջ կայացող գրեթէ բոլոր ռազմափորձերուն: Այս օրերուն Հայաստան կը մասնակցի Պիելոռուսիոյ մէջ տեղի ունեցող «Անխախտ եղբայրութիւն-2016» խաղաղապահ միացեալ ռազմափորձին:

www.aztarar.com

ՄԻՋԱԶԳԱՅԻՆ

Թուրքիա Տուն Կանչած Է Աստրիոյ Մէջ Իր Դեսպանը



«Արմէնփրես»՝ վկայակոչելով թրքական «Մթար» օրաթերթը, կը հաղորդէ, որ Թուրքիոյ արտաքին գործոց նախարար Մելուք Չաուշօղլու յայտարարած է, որ Թուրքիա Աստրիոյ մէջ իր դեսպանը տուն կանչած է՝ Աստրիոյ հետ յարաբերութիւնները վերատեսութեան ենթարկելու համար:

«Վերջին իրադարձութիւններուն հետ կապուած՝ խորհրդակցութիւններու համար մենք Վիեննայէն տուն կանչած ենք մեր դեսպանը, որպէսզի վերատեսութեան ենթարկենք Աստրիոյ հետ մեր յարաբերութիւնները», ըսած է Չաուշօղլու:

ենթարկենք Աստրիոյ հետ մեր յարաբերութիւնները», ըսած է Չաուշօղլու:

«Ռոյթըրը» լրատու գործակալութիւնը հաղորդած էր, որ Չաուշօղլու նաեւ յայտարարած է, թէ Վիեննայէն թուրք դեսպանը տուն կանչած է Աստրիոյ մէջ Քրտական աշխատատրական կուսակցութեան (ՔԱԿ) կատարած ցոյցին պատճառով. երբ ցոյցին մասնակիցները եկած են Վիեննայի Շթեֆանփլաց հրապարակ, բախումներ սկսած է քիւրտերու եւ թուրքերու միջեւ, որոնք եւս նոյն ատեն քայլարշաւ կը կատարէին:

Անգարան զայրացած է, որ Աստրիան Թուրքիոյ մէջ ահաբեկչական նկատուող ՔԱԿ-ի ներկայացուցիչներուն արտօնութիւն տուած է ցոյց կատարելու:

Չաուշօղլու Մոլտովայի արտաքին գործոց նախարարին հետ մամլոյ միացեալ ասուիսի մը ընթացքին յայտարարած է, որ Աստրիոյ հետ երկկողմանի յարաբերութեանց եւ գործակցութեան ենթահողը «դադրած է գոյութիւն ունենալէ, ուստի Աստրիոյ դեսպանատան գործավարը Թուրքիոյ արտաքին գործոց նախարարութիւն կանչեցինք եւ անոր փոխանցեցինք մեր հակազդեցութիւնը, ինչպէս նաեւ Վիեննայի մէջ մեր դեսպանը Անգարա կանչեցինք խորհրդակցելու եւ Աստրիոյ հետ մեր յարաբերութիւնները վերատեսութեան ենթարկելու համար»:

Աստրիոյ արտաքին գործոց նախարար Մեպասթիան Քուրց ազրպէյճանական ԱՓԱ լրատու գործակալութեան յայտնեց, որ իր երկիրը ի գիտութիւն առած է երկրէն թուրք դեսպանի ժամանակաւորապէս տուն կանչուիլը, սակայն մտադիր չէ փոխել Թուրքիոյ նկատմամբ իր դիրքորոշումը:

Թրքական Զօրքեր Սուտք Գործեցին Սուրիա

Թրքական հրասայլեր հիւսիսային Սուրիոյ Ժարապլուս քաղաքին մէջ Չորեքշաբթի օր առաւօտեան ժամը 4:00-ին թրքական բանակի շղթայազերծած «Եփրատի վահան» գործողութեան ծիրին մէջ մուտք գործեցին Սուրիա: Թուրքիոյ կառավարութիւնը յայտարարեց, որ գործողութեան սկսման մասին տեղեակ պահած է Ռուսիոյ, Իրանի եւ Միացեալ Նահանգներու կառավարութիւնները:

Զինուորական գործողության մասնակցեցան նաև թրքական օդուժը, հրետանին եւ մասնաշատուկ ուժերը: Միացեալ Նահանգներու փոխնախագահ Ճօ Պայտրնի Թուրքիա այցելութեան ընկերակցող ամերիկացի բարձրաստիճան պաշտօնատար մը յայտնեց, որ Ուաշինկթըն թրքական գործողութեան օդային ծածկոյթ պիտի ապահովէ:



Թուրքիոյ նախագահ Ռեճեփ Թայիփ Էրտողան սահմանամերձ շրջաններուն դէմ իրերայաջորդ յարձակումներուն վերջ դնելու համար ՏԱՀԵՇ-ն ու քրտական Ժողովուրդի պաշտպանութեան ջոկատները թիրախ դարձնող գործողութեան մը շղթայազերծումը յայտարարեց:

Նշենք, որ Սուրիական ազատ բանակին մաս կազմող զինեալ խմբաւորումներ թրքական հողամասերուն վրայ արդէն քանի մը օրէ ի վեր կը պատրաստուէին այս ճակատամարտին:

Քրտական Ժողովրդավարական միութիւն կուսակցութեան ղեկավար Սալեհ Մուսլիմ՝ մեկնաբանելով թրքական գործողութիւնը, «Թուրքիոյ»-ի վրայ գրեց. «Թուրքիան Սուրիոյ ճահիճին մէջ պիտի մատնուի պարտութեան, ճիշդ ինչպէս պարտութեան մատնուեցաւ ՏԱՀԵՇ-ը»:

Սուրիոյ արտաքին գործոց նախարարութիւնը դատապարտեց թրքական հրասայլերուն սուրիական հողեր մուտք գործելը՝ զայն նկատելով սուրիական գերիշխանութեան ոտնահարում: «Ահաբեկչութեան դէմ պայքարը ՏԱՀԵՇ-ը վտարելով եւ անոր տէր Անգարայի աջակցութիւնը վայելող այլ ահաբեկչական խմբաւորումներու տեղաւորումով չ'ըլլար», ըսաւ նախարարութիւնը:

Նշենք, որ «Անատոլու» լրատու գործակալութիւնը հաղորդեց, որ սուրիական զինեալ ընդդիմութենէն խմբաւորումներ գրաւած են Ժարապլուսէն 5 քիլոմէթր հեռաւորութեան վրայ գտնուող Քիքլիճա գիւղը: Աւելի ուշ հաղորդուեցաւ, որ անոնք մուտք գործած են Ժարապլուսի կեդրոնը:

Ռուսիոյ արտաքին գործոց նախարարութիւնը խոր մտահոգութիւն արտայայտեց Սուրիոյ մէջ թրքական միջամտութեան նկատմամբ եւ շեշտեց, որ Անգարան Սուրիոյ սահմանին վրայ ահաբեկչութեան դէմ պայքարը պէտք է համակարգէ Դամասկոսի հետ:

«Թուրքիան Կ'ուզէ Միանալ Երասիական Տնտեսական Միութեան» Կ'ըսէ Զէյյաքճի

«Արմէնփրես» կը հաղորդէ, որ Թուրքիոյ տնտեսութեան նախարար Նիհաթ Զէյյաքճի թրքական «Տէյլի Սապահ» օրաթերթին հետ հարցազրոյցի մը ընթացքին յայտարարած է, որ Թուրքիան կ'ուզէ միանալ Երասիական տնտեսական միութեան:

«Ռուսիան կը գլխաւորէ Երասիական մաքսային միութիւնը, որուն մէջ կը մտնեն այնպիսի երկիրներ, ինչպիսիք են Պիելոռուսիան, Խըրխըզիստանը, Ղազախստանը եւ Հայաստանը: Ի հարկէ, մենք կ'ուզենք միանալ Երասիական մաքսային միութեան՝ սակայն առանց վնասելու Եւրոպական Միութեան անդամակցելու Թուրքիոյ հոլովոյթին», ըսած է Զէյյաքճի:

«Մինչևի ոռուսական օդանավին վար առնուիլը՝ 24 նոյեմբեր 2015-ին, մենք բանակցութիւններ կը վարէինք Ռուսիոյ հետ ազատ առեւտուրի գօտի ստեղծելու մասին, ինչի վերաբերեալ շրջանակային համաձայնութիւնը Ռուսիոյ տնտեսութեան նախարարին հետ ստորագրուած է Ռուսիոյ նախագահ Վլատիմիր Փութինի Թուրքիա կատարած այցելութեան ընթացքին: Այժմ մենք վերականգնած ենք այդ բանակցութիւնները եւ կ'ուզենք զանոնք աւարտել կարելի եղածին չափ շուտ», աւելցուցած է ան:



Ըստ թուրք նախարարին, ազատ առեւտուրի գօտին պիտի ընդգրկէ ծառայութիւններու եւ ներդրումներու առաջին հատուածը: Հետագային կողմերը կը ծրագրեն այնտեղ մտցնել արդիւնաբերական արտադրութիւնը, մասնաւորաբար, գիւղատնտեսական հատուածը:

Լարիժանի. «Համատանէն Ռուսական Թոյիչքները Չեն Դադրած». «Մօտէն Կը Հետեւինք Ռուսիոյ Եւ Իրանի Միջեւ Գործակցութեան» Կ'ըսէ Թոնըրը



Միացեալ Նահանգներու արտաքին գործոց նախարարութեան բանբեր Մարք Թոնըրը յայտնեց. «Ուաշինկթըն ծանօթ է Սուրիոյ մէջ օդային հարուածներ կատարելու համար Ռուսիոյ կողմէ իրանեան ռազմակայանը օգտագործելու տեղեկութիւններուն»՝ աւելցնելով, որ Ուաշինկթընի համար յստակ չէ, եթէ Ռուսիոյ կողմէ նշեալ ռազմակայանի օգտագործումը վերջնականապէս դադրեցուած է:

«Ուաշինկթըն մօտէն կը հետեւի Ռուսիոյ եւ Իրանի միջեւ գործակցութեան եւ մեզի համար յստակ չէ, թէ, բացի մամլոյ տեղեկութիւններէն եւ հրապարակային յայտարարութիւններէն, եթէ օդուծի այդ ռազմակայանին անոնց կողմէ օգտագործումը վերջնականապէս դադրեցաւ, սակայն պիտի շարունակենք կացութեան հետեւիլ», նշեց Մարք Թոնըրը:

Միւս կողմէ, իրանեան «Մեհր» լրատու գործակալութիւնը հաղորդեց, որ Իրանի խորհրդարանի նախագահ Ալի Լարիժանի յայտնած է, որ իրանեան Համատան ռազմակայանէն ոռուսական ուժաւորութիւնները թոյիչքները չեն դադրած:

Խորհրդարանի նիստին ընթացքին նշել է ետք, որ Իրան ահաբեկչութեան դէմ պայքարին մէջ կը դաշնակցի Ռուսիոյ հետ, ան աւելցուցած է. «Այդ դաշինքը ի շահ շրջանի իսլամներուն է»:

«Կը շարունակենք ընդգծել, որ Իրան ոչ ոքի ռազմակայան յանձնեց, եւ այդ ռազմակայանը ուժաւորութիւններուն վառելանիւթ մատակարարելու համար է, իսկ եթէ պէտք ըլլայ ստոր մանրամասնութիւնները կը քննարկենք խորհրդարանին մէջ», ըսած է Լարիժանի:

ԱՆՂՐԱՂԱՐԶ

Թուրքիոյ Նկատմամբ Անվտանգութեան Ամրապնդման Նպաստող Յայտարարութիւն Մը

Թուրքիոյ տնտեսութեան նախարար Նիհաթ Զէյյապէճի թրքական իշխանամէտ «Տէյլի Սապահ» օրաթերթին հետ ունեցած եւ 19 Օգոստոսին հրապարակուած իր հարցազրոյցին մէջ յայտարարեց. «Ռուսիան կը ղեկավարէ Եւրասիական տնտեսական միութիւնը (ԵՏՄ), որուն մաս կը կազմեն Պիելդոռուսիոյ, Ղազախստանի, Ազրպէյճանի (աչք ծակող սխալ մը: ԵՏՄ-ի 4-րդ անդամը Խըրխըզիստանն է) եւ Հայաստանի նման երկիրներ: Անշուշտ կ'ուզենք մաս կազմել Եւրասիական տնտեսական միութեան՝ առանց վտանգելու Եւրոպական Միութեան լիարժէք անդամակցութեան նպատակները եւ խախտելու մաքսային միութիւնը»:

Անշուշտ, որ 183 միլիոն մարդոցմէ բաղկացած եւ 4 եռիլիոն ներքին համախառն արտադրութիւն ունեցող ԵՏՄ կոչուած շուկան կրնայ հետաքրքրել Թուրքիան, սակայն անոր տնտեսութեան նախարարին կատարած յայտարարութիւնը աւելի պատգամներու յղման համար է, քան իսկական փափաքի արտայայտման: Պահ մը մտնանք անվտանգութեան եւ այլ առումներով Արեւմուտքէն կախեալութեան իրողութիւնը եւ նշենք, որ Թուրքիան չի կրնար ԵՏՄ-ին անդամակցիլ առանց բանալու Հայաստանի հետ իր սահմանը եւ առանց Երեւանի հաւանութեան: Հայաստան-Թուրքիա արձանագրութիւններու նախադէպի լոյսին տակ կարելի է նշել, որ Թուրքիան դժուար թէ դիմէ իր «փոքր եղբօր» դաւաճանելու քայլին:

Միացեալ Նահանգներու փոխնախագահ Ճօ Պայտընի այսօր Թուրքիա կատարելիք այցելութենէն եւ այդտեղ Սուրիոյ, Ֆեթհուլլա Կիլիչի եւ լարուած երկկողմանի յարաբերութիւններու հարցերուն շուրջ ունենալիք բանակցութիւններէն 5 օր առաջ հրապարակուած հարցազրոյցին մէջ տեղ գտած արտայայտութիւնը պատահական չէ: Անիկա ճնշում բանեցնելու փորձ մըն է: Ուաշինկթըն դէմ է ԵՏՄ-ին եւ զայն կը նկատէ յետխորհրդային երկիրները ռուսական տիրապետութեան տակ առնելով՝ Խորհրդային Միութիւնը նոր տարագով վերականգնելու փորձ մը:

ՕԹԱՆ-ի անդամ Թուրքիոյ տնտեսութեան նախարարին կատարած այս յայտարարութիւնը չի կրնար դժգոհութիւն ջառաջացնել Ուաշինկթընի եւ Պրիւքսելի մէջ, սակայն դժուար թէ ահագանգ հնչեցնէ, որովհետեւ ամերիկեան վարչակազմը եւ ՕԹԱՆ-ի ղեկավարութիւնը քաջ գիտեն, թէ Ռուսիան չի կրնար Թուրքիոյ համար ըլլալ լուրջ այլընտրանք մը:

Զէյյապէճի յայտարարութիւնը նաեւ պատգամ մը կը փոխանցէ Եւրոպական Միութեան, որուն հետ եւս յարաբերութիւնները լարուած են: Անգարան ԵՏՄ-ն Եւրոպական Միութեան իբրեւ այլընտրանք ներկայացնելով կը փորձէ ճնշում բանեցնել Եւրոպական Միութեան եւ անոր անդամ երկիրներուն վրայ՝ նուազագոյն զիջումներով յառաջ մղելու եւ արագացնելու համար միութեան իր անդամակցութեան հոլովոյթը:

Թուրքիոյ տնտեսութեան նախարարին կատարած արտայայտութիւնը դժուար թէ Ուաշինկթընի եւ Պրիւքսելի կողմէ ընկալուի իբրեւ լուրջ սպառնալիք մը կամ նոյնիսկ իսկական փափաքի մը արտայայտութիւնը: Այդ յայտարարութիւնը լաւագոյն պարագային պիտի անտեսուի կամ ալ յաւելեալ դժգոհութիւն պատճառելով պիտի նպաստէ Թուրքիոյ նկատմամբ անվտանգութեան ամրապնդման:

ՎԱՀՐԱՍ ԷՄՄԻՆԱՆ

ԱԿՆԱՐԿ

Թուրքմենական Եւ Քրտական Գործունեքը Ռուս-Թրքական Ժամանակաւոր Մերձեցման Լոյսին Տակ



Մուրիական պատերազմի խճանկարը կը թուի, որ աւելի բարդ մեկնաբանելի համապատկեր կը պարզէ: Հալէպի շրջանի նախ կառավարական ուժերու կողմէ շրջափակումը, ապա զինեալ խմբաւորումներու կողմէ այդ շրջափակումին ճեղքումն ու շրջանին հակառակ ուղղութեամբ իրողական շրջափակումը եւ աւելի ուշ դարձեալ կառավարական ուժերուն կողմէ Հալէպի ապաշրջափակումը ենթադրել կու տան, որ

ուժերու հիմնական որբւէ տեղաշարժ չէ արձանագրուած տակաւին. շրջափակում-ապաշրջափակում այս պարանաձգութիւնը, որ իւրովի գոյավիճակի (սթաթիւս քօ) համագոր գործընթաց էր, կը յամենայ տակաւին ընդհանուր առումով:

Մինչ, հասկնալի եւ տրամաբանական ակնկալութիւնը այն էր, որ ռուս-թրքական մերձեցումը գետնի վրայ իր զինուորական արձագանգը պիտի գտնէր առնուազն կայուն զինադուլի կամ թայմ աուրթի մը առաջնորդելով երկրին մէջ շարունակուող պատերազմը:

Կառավարական ուժեր-զինեալ խմբաւորումներ ընդհանուր բախումներէն զատ երկու ցուցանշային իմաստ ունեցող կէտեր կրնային անմիջական հետեւանքի համոզում փոխանցել ընդհանուր ուղղութեան: Առաջինը Անգարայի կողմէ թէկուզ պատրուակային իմաստով օգտագործուող թուրքմեններու գործունէ էր: Չմոռնանք, որ ռուսական զինուորական օդանաւը թրքական հակաօդային ուժերուն կողմէ ջախջախուած էր հիմնականին մէջ թուրքմենական դիրքեր ռմբակոծելու ի պատասխան, թէւ Անգարան կը շարունակէր կրկնել, որ ռուսական օդանաւը հատած էր Թուրքիոյ օդային տարածքը:

Ռուս-թրքական մերձեցման նախօրեակին եւ որոշ ժամանակէ ի վեր թուրքմեններու դիրքերուն վրայ ռուսական օդուժի յարձակումները դադրած էին արդէն: Ռուսական օդանաւին վար առնուիլը թրքական բանակի հակաօդային բաժինին կողմէ նաեւ ազդարարութիւն էր, որ Մոսկուան դադրեցնէ իր ազգակիցներուն վրայ իրականացուող յարձակումները: Հակառակ ստեղծուած միջպետական տագնապին, Անգարայի ուղերձը կը թուի, որ տեղ հասած էր: Իսկ հիմա, որ մերձեցումը ծայր առած է, կ'ակնկալուի, որ Մոսկուան մոռացութեան տայ թուրքմեններու գործունէ որոշ ժամանակի համար, ինչպէս իր ջախջախուած օդանաւի հարցը: Ընդգծենք, որոշ ժամանակի համար:

Երկրորդ ցուցանշային գործունէ քրտականն է, որ շատ աւելի բարդ կացութիւն կը պարզէ: Հասաքէի մէջ քիւրտ-սուրիական բախումները չեն տարուիք ամբողջ Մուրիոյ տարածքին: Ճշդեմք նաեւ, որ առաջին անգամը չէ, որ քրտական զինեալ կազմակերպութիւններ բախումներ կ'ունենային սուրիական կառավարական ուժերու դէմ: Այդ բախումները պարագայական էին եւ ընդհանուր առմամբ շատ աւելի բուռն էին իսլամական խմբաւորումներու դէմ: Հիւսիսային Մուրիոյ մէջ քիւրտերը իրենցմէ դուրս որբւէ ուժի սահմանը հատող ներկայութիւն կը նկատէին

ոսնձգութիւն իրենց ինքնավարութեան: Այս տրամաբանութեան մէջ աւելի համոզիչ կը դիտարկուին քիւրտ-արաբ վերջին բախումները: Մինչ Հալէպի շրջանի քիւրտերը կը շարունակէին իրենց բախումները իսլամական խմբաւորումներուն դէմ:

Քիւրտերուն դիրքորոշումներն ու բախումները հեռակառավարուած ըլլալու տպաւորութիւնը կը ձգեն: Գուցէ պատահական չէր, որ Փենթակոնը Հասաքէի մէջ տեղի ունեցած միջադէպերէն ետք զգուշացուցած էր սուրիական բանակը Միացեալ Նահանգներուն եւ անոր դաշնակից ուժերու մօտակայքը զինուորական գործողութիւններ կատարելէ: Թէեւ դաշնակից ուժեր ըսելով Ուաշինկթըն կ'ակնարկէր Միջազգային դաշինքի ուժերուն, այսուհանդերձ Հասաքէի դէպքերուն առիթով կատարուած այս զգուշացումը պարզ կը դարձնէր, որ այդ ուժերուն մէջ կը ներառուի նաեւ քրտական ուժը: Ուաշինկթըն աւելի հեռու կ'երթար ըսելու համար, որ եթէ սուրիական ուժերը շարունակեն ուժակոծել քրտական շրջանները, ապա ամերիկեան օդուժը պիտի պաշտպանէ ցամաքային ուժերը: Աւելի'ն. ամերիկեան օդուժը թոյլ չէ տուած, որ սուրիական օդուժը հատէ Հասաքէի օդային տարածքը: Հասաքէն արդէն ամերիկացիներուն համար Սուրիոյ տարածքային ամբողջականութեան մաս չկազմող հիւսիսային Սուրիոյ կամ ինքնավար Քիւրտիստանի շրջանն է, որուն օդը եւս արտօնուած չէ հատել ոչ քրտական կամ



այս պարագային Միացեալ Նահանգներուն կողմէ հովանաւորուած Միջազգային դաշինքի անդամ որեւէ ուժի:

Ինչպէս որ ռուսերուն արտօնուած չէր ուժակոծել թուրքմենական տարածքներ եւ չհատել Թուրքիոյ օդային սահմանը, այնպէս նաեւ արտօնուած չէ սուրիական ուժերուն հատել Քիւրտիստանի օդային տարածքը:

Բայց խնդիրը աւելի սուր եւ նշանակալի իմաստ ունի այս պարագային: Ուաշինկթըն փաստօրէն

Սուրիոյ անդամահատումին կամ մասնատման համազօր պաշտօնական յայտարարութեամբ հանդէս կու գայ. Հաւանաբար այս ուղերձին է, որ կը հակազդէ Անգարայի վարիչը, երբ ցուցադրական զօրակցութիւն կը յայտնէ Սուրիոյ տարածքային ամբողջականութեան եւ պաշտօնական բանքերներու ճամբով շրջադարձ կը կատարէ յայտարարելու համար, որ նախագահ Ասատ ահաբեկիչներ չէ ուղարկած Թուրքիա:

Սուրիոյ մասնատումի քրտական երեսը կամ հիւսիսային Սուրիան Անգարայի մղձաւանջն է: Անոր մէջ Անգարան կը տեսնէ նաեւ Թուրքիոյ մասնատման սպառնալիքը դարձեալ քրտական գործօնին աշխուժացումով եւ մանաւանդ Ուաշինկթընի եւ ընդհանրապէս Արեւմուտքի ցուցաբերած զօրակցութեամբ:

Իրար հակակշռող ուժերու կամ զինուորական գետնի վրայ քայլ-հակաքայլ պարանձգուող այս գործընթացները մտածել կու տան, որ ռուս-թրքական մերձեցումը գետնի վրայ շատ տեղաշարժներ ապահովելու առաձգականութիւն չունի: Իսկ թուրքմեններու գործօնը շատ հեռու է քրտականին ներկայացուցած ազդեցիկութեան հետ բաղդատուելէ:

«Ա.»

www.armenianprelacykw.org

ԼՈՒՐԵՐ ԳՍՂՈՒԹՆԵՐԷՆ

«Ինձի Համար Ազգային Եւ Մարդկային Պարտականություն Է Դպրոցի Դռները Բաց Պահելը» Անդրանիկ Պողոսեան



Օգոստոս 24-ին ՀՀ սփիւռքի նախարար Հրանտյ Յակոբեան ընդունեց կրթասիրաց Մարգի Չեմպերճեան երկրորդական վարժարանի տնօրէն, Սուրիոյ գաւառական ժողովի անդամ Անդրանիկ Պողոսեանը:

Նախարար Հրանտյ Յակոբեան ջերմօրէն ողջունեց հիւրը՝ արժեւորելով Սուրիոյ մէջ հայ համայնքի պահպանութեան ուղղուած

անոր ազգանպաստ գործունէութիւնը: Նախարարը մասնաւորապէս նշեց. «Սիրիայում այդ դժուարին պայմաններում դպրոցը պահելով՝ իսկապէս հերոսութիւն էք անում: Ի հարկէ, ձեր անվտանգութիւնը ամէն ինչից վեր է, բայց համայնքը պահելը, սերունդ կրթելը շատ կարեւոր է: Հպարտ եմ, որ այսպիսի մարդիկ կան, որ ապրում են Հայրենիքը, ազգը սիրելով ու նրանց ծառայելով»:

Անդրանիկ Պողոսեան շնորհակալութիւն յայտնեց ջերմ ընդունելութեան եւ գնահատանքի խօսքերուն համար: Անդրադառնալով սուրիահայութեան խնդիրներուն՝ ան ընդգծեց. «Ձեր խօսքը մեզի համար շատ ծանրակշիռ է: Ամենամօտիկը Դուք էք, որ մշտապէս կապի մէջ էք մեզի հետ եւ Ձեզի կ'ապաւինինք: Ինձի համար ազգային եւ մարդկային պարտականութիւն է դպրոցի դռները բաց պահելը: Ուրախ եմ, որ կրնամ մեր փոքրիկներուն հոգ տանելով՝ օգտակար ըլլալ ոչ միայն ուսումնական, այլեւ առօրեայ հարցերուն մէջ: Ուրախ եմ, որ կրնամ պարտականութիւնս կատարել»:

Ջրոյցին ընթացքին քննարկուեցան Սուրիոյ մէջ տիրող իրավիճակին, հայ համայնքի խնդիրներուն ու յետագայ քայլերուն առնչուող հարցեր:

Թալին Նայիր՝ Պէզճեան Մայր ՎարժարանիՆորանշանակ Տնօրէն



Ս. Աստուածածին Աթոռանիստ Մայր եկեղեցւոյ Թաղային խորհուրդն ու Պէզճեան մայր վարժարանի հիմնադրի ներկայացուցիչ Սեւան Կիրին Պոլսոյ Պէզճեան Մայր վարժարանի տնօրէն նշանակեցին Թալին Նայիր, որ շուրջ տասնհինգ տարիէ ի վեր համայնքային զանազան վարժարաններու մէջ բազմաբնոյթ պաշտօններ ստանձնած է: Նայիր ստանձնեց պաշտօնը բազմավաստակ ու փորձառու կրթական մշակ Եղիսաբէթ Չաթանասլանին, որ 2015-2016 կրթական շրջանի աւարտին որոշեց հանգստեան կոչուիլ՝ բազմաթիւ տարիներու իր երախտաշատ ու նուիրեալ կրթական գործունէութենէն ետք:


«Անուշաւան Աբրահամեան» Կրթական Հիմնադրամի ճարտարագիտական Երկու Աշխատանոցներու Բացում

Ըստ Անճելլիսի մէջ հիմնադրուած «Անուշաւան Աբրահամեան» կրթական հիմնադրամը, հաւատարիմ մնալով իր առաքելութեան, քայլ մը եւս առաւ Հայաստանի շրջաններու երիտասարդութեան ապագայի կերտման ճամբուն վրայ:

Հիմնադրամին նախաձեռնութեամբ եւ տեղեկատուական արհեստագիտութեանց ձեռնարկութիւններու միութեան հետ համագործակցութեամբ, Հայաստանի կրթութեան եւ գիտութեան նախարարութեան երկու ուսումնական հաստատութիւններու մէջ բացուեցան ճարտարագիտական աշխատանոցներ: Առաջինը՝ Արմաւիրի ճարտարարուեստի մանկավարժական պետական դպրոցին մէջ, իսկ երկրորդը՝ Մարալիկի Պետական արհեստագործական ուսումնարանին մէջ:

Այս ծրագիրին միջոցով աշակերտները առիթ կ'ունենան ուսումնասիրելու համակարգչային ծրագրաւորման, եռաչափ տպագրութեան, մարդամեքենաներու նախագծման, ստեղծումին ու կառավարման ծախքերը: Այս մասնագիտութիւնները աշխատանքի առիթներ գտնելու նոր կարելիութիւններ կը ստեղծեն, քանի որ արդի արհեստագիտութեանց ոլորտը նոր մասնագէտներու մեծ պահանջ ունի:

Սեպտեմբերին պիտի սկսին առաջին դասընթացքները, որոնք պիտի իրականացուին անվճար՝ ներգրաւելով ուսանողներու աւելի լայն շրջանակ: Աշխատանոցին մէջ ծաւալուելիք հետագայ դասընթացքները շարունակական կերպով պիտի քաջալերուին Հայաստանի կրթութեան եւ գիտութեան նախարարութեան կողմէ, որովհետեւ այս բացառիկ նախաձեռնութիւնը կը դիտուի իբրեւ մտային կարողութեան եւ ստեղծագործութեան համադրումի գերազանց օրինակ:



Պուէնոս Այրեսի Հայկական Եկեղեցին Ներառուած Է Քաղաքի Զբոսաշրջութեան Ծրագիրին Մէջ



Արժանթինի մայրաքաղաքի Փալերմօ շրջանին մէջ գտնուող Պուէնոս Այրեսի Սուրբ Գրիգոր հայկական եկեղեցին ներառուած է քաղաքի զբոսաշրջութեան այցի պաշտօնական ծրագիրին մէջ:

Քաղաք այցի պաշտօնական ծրագիրով զբոսաշրջիկները կրնան տեսնել ճարտարապետական յուշարձաններ, թատրոններ,


թանգարաններ, ինչպես նաև հայկական եկեղեցին:

«Ճանչցի՛ր Պուէնտս Այրեսը» ծրագիրը կազմողները ներառած են հայկական եկեղեցին՝ նպատակ ունենալով ընդգծել քաղաքի հայ համայնքին կարեւորութիւնը:

14 Օգոստոսին Կլենտլի Ս. Աստուածածին եկեղեցւոյ մէջ մատուցուեցաւ Ս. պատարագ եւ կատարուեցաւ խաղողօրհնէք ու մատաղօրհնէք:

Թեմի առաջնորդ Մուշեղ արք. Մարտիրոսեան իր քարոզին մէջ անդրադարձաւ Աստուածածինի երկրային կեանքին՝ մատնանշելով, որ ան ամբողջ կեանք մը ապրեցաւ առաքինութեամբ, համեստութեամբ, հնազանդութեամբ, խոնարհութեամբ, սրբութեամբ եւ մաքրութեամբ, դարձաւ կիներուն ամենէն օրհնեալն ու ընտրեալը, իբրեւ Աստուածորդոյն մայրը՝ հոգաց Անոր բարի դաստիարակութիւնը, եւ Զուակին խոստումին իրականացումով՝ արժանի դարձաւ երկնային բնակութեան: Ան որպէս մայր կրեց աշխարհի ամենէն ծանր կսկիծը՝ զուակի կորուստը, սակայն միշտ մնաց տոկուն իր հաւատքի կեանքին մէջ, դառնալով Քրիստոսի եկեղեցւոյ մայրը, պաշտպանը, հիմքն ու ինամատար բարեխօսը: Սրբազանը իր խօսքը աւարտեց աղօթելով Աստուածածինին, որ բարեխօսէ Հայաստանին, Արցախին եւ հայ ժողովուրդին համար, խաղաղութիւն պարգեւէ անոնց ու Միջին Արեւելքին, որոնք դժուար պահեր կ'ապրին այս օրերուն:

Ժաք Յակոբեանի Ծննդեան 100- Ամեակին Եւ Իր ԲեղունՎաստակի 80 Ամեակին Նուիրուած Ձեռնարկ



30 հոկտեմբերին Կլենտլի Փրիսպիթիբեան եկեղեցւոյ մէջ տեղի պիտի ունենայ սփիւռքահայ բանաստեղծ, մշակոյթի գործիչ Ժաք Յակոբեանի ծննդեան 100-ամեակին եւ անոր բեղուն վաստակի 80-ամեակին նուիրուած ձեռնարկ: Ձեռնարկը կազմակերպուած է Մաշտոց քոլեճի կողմէ եւ կը վայելէ հովանաւորութիւնը Արեւմտեան Ամերիկայի Հայաստանեայց առաքելական եկեղեցւոյ ազգային առաջնորդարանին, Ամերիկայի Հայաստանեայց առաքելական եկեղեցւոյ ազգային առաջնորդարանին, Հայ կաթողիկէ ժողովրդապետութեան եւ Հիւսիսային Ամերիկայի հայ աւետարանական միութեան:

Ժաք Յակոբեան հեղինակ է 35 հատորներու: Ան նաև եղած է հայոց լեզուի եւ գրականութեան ուսուցիչ Լիբանանի Կենաց երկրորդական վարժարանի մէջ եւ Փասատինայի Սահակ Մեսրոպ հայ քրիստոնէայ վարժարանին մէջ:

Յայտագիրը պիտի բովանդակէ երկու բանախօսութիւն, ողջոյնի խօսքեր եւ վկայութիւններ, ինչպէս նաև գեղարուեստական բաժին, որուն ընթացքին պիտի ցուցադրուի բանաստեղծին կեանքը ներկայացնող տեսերիզ մը, նաև պիտի հրամցուին նուագներ եւ ասմունք:

ԱՅԼԱԶԱՆ

Լացող Անձերը Աւելի Երկար Կ'ապրին



Մարդիկ յաճախ կը զսպեն իրենց արցունքները՝ լացը ամօթալի կամ տկարութեան նշան համարելով:

Ամերիկացի գիտնականներ, հետազօտելով մարդկային արցունքները, բացայայտած են, որ արցունքները կը պարունակեն նիւթեր, որոնք կը մեղմացնեն ֆիզիքական ցաւը եւ իրենց ազդեցութեամբ կը յիշեցնեն մորֆինը: Անոնք նաեւ արցունքներուն մէջ յայտնաբերած են նիւթ մը, որ մանրէասպան յատկութիւն ունի:

Հետաքրքրական է այն երեւոյթը, որ արցունքներուն կենսաքիմիական բաղադրութիւնը կախեալ է անոնց դրդապատճառներէն: Եթէ անձ մը տառապանքի կամ ֆիզիքական ցաւի պատճառով կու լայ, անոր արցունքներուն բաղադրութիւնը կ'ունենայ հանգստացնող յատկութիւն: Մինչդէռ խնդրքի պատճառով հոսած արցունքներուն բաղադրութիւնը բոլորովին տարբեր կ'ըլլայ...

Գիտնականներուն կարծիքով, կիները հինգ անգամ ավելի յաճախակի կու լան, քան տղամարդիկ: Անոնք ապացուցած են, որ սերտ կապ կայ լացին եւ սրտանօթային հիւանդութիւններուն միջեւ: Այսպէս՝ արցունքը դուրս հանելով բացասական զգացումները կարեւոր տոկոսով կը կանխարգիլեն վերոյիշեալ հիւանդութիւնները: Իսկ տղամարդիկ, որոնք վարժուած են զսպել արցունքները եւ իրենց անյաջողութիւններուն տոկալ լուռ եւ անարցունք, առաւել եւս ենթակայ են սրտանօթային հիւանդութիւններու եւ, բնականաբար, կը կրճատուի անոնց կեանքը:

Եզրափակելով, գիտնականները յայտնած են, որ այն անձերը, որոնք քիչ կու լան, ենթակայ են աչքի անհանգստութիւններու եւ մորթային հիւանդութիւններու:

Միւս կողմէ, ընկճախտէ տառապող իւրաքանչիւր անձ կարիք ունի հոգեբանական պաշտպանութեան: Մէկը ինքզինք կը յանձնէ խմիչքին, ուրիշ մը ինքնաշարժին դեկին նստած շատ արագ կը վարէ, երրորդ մը՝ գոռալով եւ կռուելով կը լիցքաթափուի... Սակայն ասոնցմէ ոչ մէկը իր արդիւնաւետութեամբ կը հասնի սովորական լացին... Չէ՞ որ լացին կը յաջորդէ յարաբերական անդորր, արցունքները կը մաքրեն սեւ միտքերը եւ կը հանգստացնեն:

* * *

«Երբ արցունքները կը խեղդեն, երբ սիրտը կը ճմլուի, երբ լարուած եւ անհանգիստ էք, երբ փակուած պատերու մէջ կը զգաք դուք ձեզ լացէ՞ք, լացէ՞ք ազատ եւ սրտաբուխ, լացէք, որպէսզի դուրս հանէք բացասական յոյզերը՝ հոգիով եւ մարմինով վերածնելու համար»:

Կ'արժէ մտածել այս մասին...

www.aztagdaily.com

Նազիկ Աստալեան

«Ռիո 2016»-ի աղջկանց 69 քկ դասակարգի ծանրաբարձութեան մրցումներուն 5-րդ դիրքը գրաւած Նազիկ Աստալեանը արդէն վերադարձած է հայրենիք:

Եւրոպայի ախոյեան, 2009 թուականի աշխարհի ախոյեան Նազիկը յայտարարած է. «Մէջքիս վնասուածքը թոյլ չտուաւ, որ մետալ շահիմ: Շատ կը փափաքիմ մասնակցիլ Եւրոպայի յաջորդ ախոյեանութեան»:




Նազիկին համաձայն, Եւրոպայի մրցումէն ետք ստացած էր չնախատեսուած վնասուածքներ, որոնք խանգարած էին իր մարզումներուն ընթացքը, եւ ամբողջ երկու ամիս գրեթէ դադրեցուցած էր ամէն տեսակի մարզումները:

«Ռիո 2016»-ը արդէն անցեալին կը պատկանի, եւ մէկ ամիս կը հանգստանամ, որմէ ետք կ'որոշեմ եթէ պիտի շարունակեմ մարզուիլ, թէ ոչ: Բայց շատ հաւանական է, որ շարունակեմ ասպարէզս, քանի որ մեծ

ցանկութիւն ունիմ մասնակցելու Եւրոպայի ախոյեանութեան», աւելցուցած է Նազիկ:

Հոտերը ճանչնալու Յատկութիւնը...



Գիտնականները պարզած են, որ երբ կերակուրը արդէն ախորժելի չի բուրեր եւ օծանելիքներուն բոյրը զգուելի կը դառնայ, ասոնք կը վկայեն լուրջ հիւանդութիւններու զարգացման մասին, կը գրէ «Տը Տէյլի Մէյլ»-ը:

Հոտառութեան խանգարումը ինքնին մահուան սպառնալիքը չ'աւելցնէր, սակայն անիկա կը վկայէ լուրջ հիւանդութիւններու մասին: Երբ անձը չի ճանչնար վարդին, ձուկին, նարինջին, կաշիին հոտերը, կը նշանակէ, որ ան առողջական լուրջ հարցեր ունի, կը յայտնեն փորձագէտները:

58-85 տարեկան 3000 մարդոց վրայ կատարուած է փորձ մը՝ ստուգելու համար անոնց հոտառութեան ընդունակութիւնները: Արդիւնք՝ կամաւորներուն մեծամասնութիւնը ճանչցած է 5 հոտերէն չորսը: 20 առ հարիւրը՝ 2-3 հոտ, իսկ մօտաւորապէս 3,5 առ հարիւրը՝ միայն մէկ հոտ, կամ առհասարակ հոտ չէ զգացած: 5 տարի ետք փորձին մասնակցած մարդոցմէ 430-ը մահացած են, եւ ատիկա 6 անգամ աւելի՝ այն մարդոց մօտ, որոնք կորսնցուցած էին հոտառութիւնը...

www.armenianprelacykw.org